



Bolazuri ar Sóore Biá

Australíat biá goríbélla honíkka ré bolazuri goróon ekkán sóngin jurúm.

Australíat, manúic ókkol biá goríbou nogoríbou ektiyar goríbélla azad. Aám hísafe, manúic uggwáttu biá goríbélla kaanuni **18** bosór ór uore wáa foribóu. Kessú háalot ot manúic uggwá 16 bosór ór uore óile biá gorífare, lékin kuúth ór odhár ekkán lage.

Manúic uggwáttu biá goríbélla razi wáa foribóu bolazuri yáto dúka sára.

Ekkán entezam goijjá biá, zeçé dunú paáthi biá goríbélla azadi sáñte monzuri diyé, yían bolazuri biá forók. Entezam goijjá biá ókkol óilde Australíat kaanuni.

Zodi tuñí yá tuñí zanodé honíkka hótarat táke **000** nombór ót fulic dhako.
Australíar fulic héfazot óla ar biccác gorífare.

Maana, húfia mocuwara arde maalumát ókkol ólla 1800 RESPECT óre dhako **1800 737 732**
nombór ót.

Zodi tuáñrtu maana torjuma goróya ekzon lage **131 450** ot dhako.

Yían bekaanuni, bolazuri biá dibellá honíkka ré loizai bélla, yá honíkka ré oinno dec ót defeçái bélla, yá honíkkár háta yían entezam goríbélla.

Bolazuri ar sóore biá dasé buzumotta, manúic oinno dec ót lora loi, yá boóudhar fará lói taaluk táke, tarár morzir uldha, ar yían bekaanuni.

Tuñí, yá tuñí sinóde honíkka, hótarat asé né?

Australíar Fédherel Fulic **Australian Federal Police** (AFP) ré dhako **131 237** ot. AFP ye cúurur mocuwara dífaribóu ar bolazuri arde sóore biá ókkol yá manúic blékgorár cíkari ókkol óre háwala gorí faribóu modot ollá, éçe tákibar-zaga, thiañr hédmot, mocuwara arde kaanuni mocuwara yó cámil asé.

Aró maalumát ókkol ólla AFP wébsáit www.afp.gov.au 'r línk gán óre fisá goró.

Australíat oinno hédmot ókkol ó asé ziyán é modot gorí faribóu.

1800 RESPECT óilde Australíar Koumi Jíns ór Hámla, Fémli arde Góror bútoror Maramarir Mocuwara hédmot (Australia's National Sexual Assault, Family and Domestic Violence Counselling service). Yían é kúfia telefún ar onláiin mocuwara arde maalumát ókkol maana de. Mocuwara douya ókkol é tuáñr hotá fúnibou, súal ókkol ór zuab díbou ar tuáñr mahállí zagat aséde oinno modot or hédmot ókkol ór éçe háwala gorí faribóu.

1800 737 732 nombór ót dhako yá 1800 RESPECT wébsáith ot zo www.1800RESPECT.org.au.

Tuáñrtu torjuma goróya ekzon lagibóu né?

Torjuma arde Hotá bāñgi doon ór Hédmot **Translating and Interpreting Services** (TIS) óre dhako maana **131 450** nombór ót. TIS é oinno hédmot ókkol lói taaluk gorí dibellá tuáñre modot gorí faribóu. TIS é mocuwara node.

Bolazuri biá arde manúic blékgorár aró maalumát ókkol ólla:

Ukil-Boro wár Dífármén Attorney-Generals' Department wébsáith ór línk gán óre fisá goró www.ag.gov.au 't mazé.